



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



Tir Yimym



tiryimym@aolima



tir yimym

TAPAK 7

China Open: Iga Swiatek Final-i iogo

Myanmar: SC-i Suu Kyi-i mepeshiba magizük



VOL. XXI NO. 01 (ADOK 01) DIMAPUR

AMUNGNÜ (SUNDAY)

MONGPUTENI (OCTOBER) 08, 2023

₹ 5.00

Joel Naga-i Gaonburah indang jangjashitsür

Dimapur, October 7, 2023 (TYO): Dimapur nung gaonbura indang jembibaji pa nija tebilemba aser GBs tenung menüka mejembi ta Rising People's Party president Joel Naga-i ashi.

New Market Colony, Dimapur nung Gaonburah (GB) inyaksü atema Abdul Kayum Talukdar shimba atema ashishitepba mapang RPP president Joel-i GBs system indang tebilemba lemsatepa liasü.

Iba onük atema Dimapur GB Association-i Joel Naga nem anogo 14 (October 14) atema show cause notice ka agütsüogo.

“Ni Gaonburah shimba indang kü nija tebilemba lemsatep aser Naga public-i iba atema o atsüteptsüla. Naga nung longjemtsüba mapang ka nung GB Association-i show cause notice agütsüba ajanga Naga nung telongjem raksatsü. Asenok tsüngda iba amai ang tebilemba lemsateptsü asü?” ta Joel-i ashi.

“GB association president-i ashiba ama Talukdar ya non indigenous nisung ka lir. Anungji

Association-i Talukdar nem ang show cause notice agütsütsüla aser pa züngsem agientsüla. Association-isa district administration nem iba atema shidi ka zülutsüla saka parnok kü nem ang show cause notice agütsü” ta pai metetdaksü.

Political party ka ama onoki Talukdar indang tebilemetsü onük atema inyaknür saka asenok tsüngda ang raratepdang iba tebilemetsü samadoker, ta Joel-isa ashi.

Nagaland nung mapang talangka ozüng alema aruba khuret agi timtema arur. Iba atema telok ajak sendaktepa lir aser asenok ajak longjemer külemi ozüng alema aruba inyakyim atema inyaksüla ta paisa metetdaksü.

RPP-i bangdak department tem tsüngdang RTIs benoka iba onük atema inyaksü. Bendanger nem birth certificate, trade licence aser driving licence agütsüba inyakyim jangjatsü, ta Joel Naga-isa ashi.

“Tang tashi nung onok dangi GB association nungi sangdong kecha mangu anungji iba ya tebilemetsü khuret ka ama mezüngshitsü” ta paisa shisem.

NSHRC teloki Chumoukedima Police Station semdang

Dimapur, October 7, 2023 (TYO): Nagaland State Human Rights Commission (NSHRC) Chairperson Justice Songkhupchung Serto-i anir telok kati October 7, 2023 nü Chumoukedima police station semdang.

October 3, 2023 nü arishi küm 19 tain tebur ka Chumoukedima police station nung sisetba sülen NSHRC teloki police station semdangogo.

Iba mapang Justice Songkhupchung Serto aser pai aniba teloki ketdangsürtem aser

staff den asüngdangya. Parnokisa lanur sisetba lock-up tesem semdang aser tendangtsü atema footage o data bendenogo.

“Tarutsü nung ibala lendong mataloktsü atema police station nung ketdangsür aser staff kanga kümdangtsüla aser roster system inyaksüla” ta NSHRC Chairperson Serto-i ashi.

Iba mapang DCP K. M. Munesh, IPS, Chumoukedima; Commissioner of Police Kevithuto Sophie, IPS aser ACP Ninoto Zhimomi Chumoukedima nung liasü.

Abu Mehta-i German Consul General den ajurutep

Kohima, October 7, 2023 (DIPR): October 7, 2023 nü Abu Metha-i Consul General of Germany Barbara Voss den senden ka amen.

Iba mapang Advisor to the Chief Minister aser Investment & Development Authority of Nagaland (IDAN) Chairman Metha den Task Force for Music & Arts Chairman Theja Meru liasü.

Senden nung telok ana tsüngda tesentaktep akangshitsü aser amalitepa inyaksangshitsü jembitep.

Parnoki culture, music, and youth activities indang tebilemba

den people-to-people contact tajungba akümtsü jembitep.

Metha-isa Consul General tasen dang Nagaland Chief Minister ajanga salem osang abenba lemsatep.

Theja Meru-ia Nagaland nung music aser creative arts indang osang lemsatepa liasü. Iba ama senden amenba ajanga tarutsü anogotem tejang tajung atangtsü tamang akar, ta Abu Metha-i ashi.

“German Consulate-i tangatetba tajung nung aser kanga pelashishia onok agizükba atema tenüngsang agütsür” ta paisa shisem.

Drug control admin-cum-NDL office complex lapok



October 6, 2023 nü Minister P. Paiwang Konyak den tangartem Drug Control Administration-cum-Nagaland Drug Laboratory indang office complex lapokdang agiba noksa angur.

Kohima, October 7, 2023 (TYO): Health & Family Welfare minister P.Paiwang Konyak-i October 6 nü Drug Control Administration cum Nagaland Drug Laboratory lapoktsüogo.

Iba Laboratory ya Directorate of Health & Family Welfare, Kohima nung lir aser Commissioner & Secretary Health & Family Welfare V.Kezo, Principal Director, Health & Family Welfare Dr. Ritu Thurr aser tanga ketdangsürtem lia lapokogo.

Iba sentong nung Union Baptist Church Kohima Pastor Visato Yhosu-i Laboratory meshiteta sarasadem.

“Iba office complex ya Central Government Scheme indang “Strengthening of State Drug Regulatory System” kübok Rs. 5 crore endoka yanglu” ta Additional Drugs Controller, Controlling & Licensing Authority, H&FW, Nagaland W.H. Patton-i ashi.

Nagaland Drug Laboratory

indang 1st Phase maparen ya 2020 nung tenzük aser September 2023 nung tembang.

Ano, Nagaland Drug laboratory 2nd phase atema Ministry nungi temelaba ano mangu lir.

Iba Laboratory nung küm shia 1000 samples tendangtetsü akok. Iba ajanga Nagaland nung sub-standard medicines azüoktsü aser public nem mozü tajung agütsütsü ta Patton-isa metetdaksü.

Kohima Watsü Telen-i panel discussion ayongzüka agi



Dimapur, October 7, 2023 (TYO): Kohima Watsü Telen-i October 7, 2023 nü Molu Ki, Kohima nung “Kü Maitüsü, Kü Tebilemetsü” omen nung ajemdaker sentong ka agiogo.

Iba sentong nung Higher Education Retired Director Dr. Anungla Aier, Department of History & Archaeology NU Assistant Professor Dr. Aokumla Walling, Guwahati High Court Kohima Bench Advocate Toshi O Longkumer aser Guwahati High Court Kohima Bench Senior Advocate CT Jamir nungertemi shisalen sayu.

Dr. Anungla Aier-i o jembidang kibong aser loktiliba nung Ao tsürtem teinyaksü aser tebilemetsütem indang jembia.

“Loktiliba, kidong aser kibongtem nun Ao tsürtem ya tongshitem lir. Asenoki asen

maitüsü aser sobaliba wazüka ayutsüla aser pei indang maitüsü kibong nung tera yanga lir” ta laisa ashi.

Dr. Anungla-isa Ao tsürtem dang pei maitüsü, sobaliba aser inyaksangshi wazüka ayutsü aser pei tera mamadoki tanü putu den tsüngsü medema aintsü ayongzüka.

Dr. Aokumla Walling-ia Ao tsürtemi pei kibong aser sobaliba maitüsü wazüka ayutsü indang jembia.

Laia tetsürtem dang pei tera mamadoktsü aser kin, kidong mesüra kibong maparen nung shilem agitsü ayongzüka

“Tetsürtemi wadang balala nung kati ka yariteptsüla aser loktiliba nung jenjang tajungba akümtsü atema shisatsü aser sempet lemsateptsüla” ta Dr. Aokumla-isa ashi.

Advocate Toshi O Longkumer-ia tetsürtem kümzüka ayuba indang constitutional laws aser legal rights indang jembia.

Indian Constitution ajanga tetsürtem nem temeten agüja lir. Tanü putu den apet sobaliba inyakyim bentshütsüla aser maitüsü wazüka ayutsüla, ta paisa ashi.

Senior Advocate CT Jamir-i tetsürtemi wadang balala nung tongtipang shilem agiba atema pelaba metetdaksü.

Paisa tetsürtem jenjang ajungkettsü atema temeten aser ozüngtem indang lemsatep aser Watsü Telen dang item temeten meteta alitsü atema ayongzüka.

Iba panel discussion nung onirji Chubasangla Longkumer liasü aser KWT President Nukshirenla-i tesentepertem pelaa agizük.

Mokokchung nung Youth Voters Festival 2023 agiogo



October 7 nü Town Hall, Mokokchung nung Youth Voters Festival 2023 ayongzüka agiba mapang tangokba noksa nung angur.

Dimaapur, Mongputeni/October 7 (TYO): October 7 nü Town Hall, Mokokchung nung Youth Voters Festival 2023 sentong ayongzüka agiogo. Sentong nung o jembiba mapang Deputy Commissioner & District Election Officer (DC & DEO), Mokokchung, Thsuvisie Phoji-i, lanurtem ya lokti nung temelenshi bener arutsüsupurtem lir, ta ashi. Paisa, ochi mashi inyakyim nokdangtsü aser bentettsü atema lanurtemi tongtibang shilem agitsü lir aser lokti nung ajak yimjung nung alitsü atema lanurtem kanga tongtibang lir ta ashi. Thsuvisie Phoji-i ashiba agi, libaliro aser inyakyim angazüksü aser iba den liromedema aotsü asoshi lanurtem dak tashi lir. Kasaji parnok nukjidong atongtsü asoshi angazüksü parnok dak

tejangraba lir ta pai shisem. Loktiliba nung telemenshi bener arutsü atema lanurtem kabuma nung lir ta shia India ama democratic linük ka nung lanurtemi tongtibang shilem magira temelenshi aser terenlok malitsü, ta DC-i ashi. Maneni pai sentong nung shilem agiba lanurtem dang, parnok inyakyim ajak nung shisa akatsü aser talisa parnok indang senti vote agütsüba mapang shisa akatsü ajungshi, kechiyong parnok inyakyim aser parnoki shilem agiba ajanga tarutsü tia jangjatsü, ta shisem. Kasa mapang nung Assistant Election officer, Mokokchung, Renben Mozhui-i, awareness presentation ka agütsü aser District mission Coordinator Moamenla-i, Mission Shakti koda tongtibang iba indang lemsatepba liasü, koba linük ajunga nung tetsürtem

kümsüka toktsütsü aser parnok nem tashi agütsütsü atema Ministry of Women and Child Development-i amenokba scheme ka lir. Maneni sentong nung Demstify Institute for Montessori & Nursery Teachers Training, Mokokchung-i saya tatsüka sayu, Yimkumla (Jubilee College) aser Supongsangla Jamir (PwD Icon) nati ken aten aser Addl. Deputy Commissioner & SVEEP Nodal Officer, Mokokchung, Chumlamo Humtsoe-i tepela anküp o jembiba liasü. Sentong nungsa District Level Master Trainers temi EVM & VVPAT amshiyim sayu aser iba sülen sentong nung shilem agirtem Signature Campaign ka ayongzüka agia liasü. Iba sentong ya EAC (Kobulong), Seyievilie Pfkuri lenisüba nung agia liasü.

STEMFEST 2023 sentong takok ngua agiogo



Dimapur, Mongputeni/October 7 (TYO): St. John Higher Secondary Residential School, Dimapur aser TRIC NE (Technology Research and Incubation Centre, North East) nati ayongzüka Robotics and STEM Championship STEMFEST 2023 takok ngua agiogo. Iba sentong kanga takok ngua agiogo aser aji talisa sentong ayongertem, school tem aser kaketshirtem aser Sponsoring Agency Jasamli Infra (Pvt) Ltd. longjemer inyakba ajanga lir, ta sentong ayongertemi metetdaksü. Iba sentong nung Object Avoidance, Direction control, Gyro Control, Bluetooth control and Synced Mobile device movement, single touch response & control amala Sensors tem indang tangazüba agüja liasü. Technology karbo ISRO Chandrayan 3 moon Lander mission nunga amshigo. Holy Cross Higher Secondary School, St John Higher Secondary Residential School, Rincho Academy, Cornerstone School, Pilgrim School, Great Commission Kids

Academy, aser Christian English Higher Secondary School nungeri iba sentong nung kanga junga shilem agiba ajanga Dimapur, Chumukedima aser Niuland nung STEM education atema bendanga agütsür aliba aser tejangraba aliba sayur. Science, technology, engineering, aser mathematics nung lanurtem aika tejangraba aliba nguogo aser parnok sempet sayaba ngua tali ajak ajungmesor aser pelar, ta kasa sangdong ajanga ashi. STEMFEST amala sentong ajanga real-world challenge tem nung kaketshirtem nem parnok shisatsü, sangrasangji aser teamwork sayutsü asoshi maongka agütsür. Iba ajanga tangazüksü asoshi ajungmesoba dang masü saka innovators aser tebilemstü balala bentettertem putu tasen ka ajungmesor. TRIC NE nungi sentong ayongertemi iba sentong agitettsüsa teyari agütsüba aser North East nung STEM education ajungkettsü merangaba atema parnok nem tenüngsang agütsüogo. Educational institution aser TRIC NE amala lokti tentettem longjemer inyaksangshiba yagi

lanurtem sempet arantgetshiba aser STEM dak sendakba career tem asoshi parnok tarutsü atema renemshitsüba nung tongtibang shilem agir. Iba sentong takok ngua agitetba ajanga Dimapur, Chumukedima aser Niuland nung STEM lokti tentet tejakdangi aoba sayur, aser tanurtem iba maongka asoshi yongyatepa aliba jangjar. Sentong ajangsa maongka dang agütsüra tanurtem temaba jenjang nung tokteptsü asoshi tejangraba aliba kuli agütsür. Item tanurtem ya tarutsü nung scientists, inventors, innovators, engineers tem kümdaktsütsü asoshi ajaki teyari agütsütsüla. Iba sentong takok ngua agitetba ajanga kaketshirtem robotics aser STEM luyim nung maneni shilem agitsü atema ajungmesotsü aser North East aser iba tesem adena orr science aser technolgy terenlok asoshi teyari agütsütsü imlar, ta sentong ayongertemisa metetdaksü. **Tetoktepa nung takok angurtem:**
Best Assembly of Bots
 First Prize : St John Hr. Sec. Residential School
 Runner Up : Pilgrim Hr Sec. School
 Second Runner Up : St John Hr Sec. Residential School
RoboRace:
 Seniors'Winner : St John Hr Sec. Residential School
 Runners Up : Cornerstone School
 Juniors'Winner : Pilgrim School
 Runners Up : Holy Cross Hr. Sec. School

Tuensang DPDB senden menogo

Dimapur, Mongputeni/October 7 (TYO): Ita shia amenba Tuensang District Planning and Development Board senden October 7 nü ADC Tuensang Thungchanbemo Tungoe lenisüba nung menogo. Iba senden ya DC Conference Hall, Tuensang nung mena liasü. Senden tetenzüki taoba senden indang minutes tem tama lepa reprangshi aser iba sülen tongtibang ken o tem benoka sensaksema liasü. Board-i, Sangsangnyu EAC, New Chingmei EAC, aser Ngongchung EAC densema tesem balala nung Police Outposts amenoktsüba dak sendakba nung sensaksema liasü. Züngsemtemi iba onük ya asadang aser ken o maneni asadangtsü atema tapet department dangi abentsü atema telemtetba agia liasü. Ken o dak sendakba nung terenlok indang taruba senden nung lemsateptsü lemteta liasü. Kasa mapang nung sorkar

ali nija nem agütsütsü atema patta agütsüba dak sendakba nung sensaksema liasü. Mendenbubai, Heads of Offices (HoOs) temi sorkar ali aser quarter tem nung kisüjensütsü atema NOC (No Objection Certificate) magütsütsü atema tetuyuba agüja liasü. Ken o dak sendakba nung DLSRO-i osang tejangjaba agütsü aser ashiba agi, sorkar ali aser kiojen shilem 50 shi ano department-i masadangi lir. Paisa, ken o dak sendaka aliba department tem shirnoki tang tashi parnok survey osang agüja mali parnok dang takaratiba nung agütsütsü atema mepeshia metetdaksüogo. Maneni senden nung Tingbem Thowsong (SDPO Tuensang), S. Kavito Aomi (Assistant Director of Food and Civil Supplies Tuensang), aser Lipongse Sangtam (District Employment Officer) ta ketdangsur tasen asem pelashishia agizüka liasü.

Kohima nung tesayurtem atema training aser awareness sentong ayongzüka agi



Oral Health dak sendakba nung training aser awareness sentong nung shilem agirtem aser shisalen sayurtem tangokba noksa nung angur.

Dimapur, Mongputeni/October 7 (TYO): National Oral Health Programme, Kohima District-i ayongzüka October 6 nü oral health koda tongtibang iba dak sendakba nung Government Middle School, Keyake tesayurtem atema training aser awareness sentong ka ayongzüka katsüogo. Iba sentong ya oral health aser hygiene dak sendakba nung tesayurtem nem tangazüba agütsütsü nukjidong nung ayongzüka agiogo. Sentong tenzüka Dr. Mhonsenli Yanthan-i, oral health aser hygiene indang tatsü agi metetdakja liasü. Iba sülen Dr. Noyingbeni Khuvung-i, tebang nung kanga bulua adokba tasidaktem aser item tashidaktem nungi koda jenboa alitsü aser anepalutsü iba indang tangazükba Power Point presentation ka ajanga agüja liasü. Kasa mapang nung District Oral Health Officer, Dr. Simon I. Sumi-i moko achiba ajanga

tebang nung koda timtem adoker iba indang lemsatep. Paisa, tepu meyuba yimya tim sayua liasü. Sentong nungsa sensaksem sentong ka ayongzüka agi aser iba ajanga tesayurtem nem parnoki mangatetba onüktem jangjashitsü atema maongka agüja liasü. Ajak senteeper iba sentong nung tesayur 15-i shilem agi aser kaketshirtem yongtsü nung oral health ajungkettsü atema parnok bendanga agütsür aliba sayuogo. Iba sentong ya GMS Keyake Head Teacher Khriesavilie Solo lenisüba nung agia liasü. Sentong nungsa GMS Keyake Assistant Head Teacher Imlimenla-i, tepela o jembiba aser lai sentong nung shilem agirtem aser sentong ayongertem dang parnoki parnok indang senti mapang agütsüba atema kanga pelaba lemsatepa liasü. Sentong nung shilem ka ama toothbrushes, toothpaste, aser informative materials (IEC materials) tem lemja liasü.

GST Council-i saru dak sendakba telemtetba kar agiogo



October 07, 2023 nü New Delhi nung 52buba Goods & Services Tax (GST) Council senden nung Tamil Nadu Finance Minister, Thangam Thennarasu aser Punjab Finance Minister, Harpal Singh Cheema na den tangartem adenba noksa nung angur.

New Delhi, Mongputeni/October 07 (Agencies): Honibarnü GST Council senden nung corporates-i subsidiaries nem agütsüba guarantee nung GST saru shilem 18 agitsü aser director-i company nem personal guarantee agütsüra saru magitsü telemtetba agiogo. New Delhi nung Union Finance Minister, Nirmala Sitharaman leniba nung amenba senden nungsa mochitsü nung GST saru shilem 28 agia aliba nungi shilem 5 dang agitsü lemtet. GST Council-isa state tem nem Extra Neutral Alcohol saru temeden agüja aliba agienogo. Nisung atema amshiba ENA

nung Goods and Services Tax (GST) saru magitsü saka industry atema amshiba ENA nungbo GST saru shilem 18 agitsü. 52buba GST council senden tembangba sülen osangbenertem den jembidang Union Minister, Nirmala Sitharaman-i, mochitzü nung GST saru shilem ajemba ajanga mochitzü lu ayimertem tajangzük angutsü, ta metetdaksü. Laisa, "Iba ya ajanga shiruru nem agütsüba chiyungtsü jenjang ajemtsü," ta metetdaksü. GST Council-isa menjang agi yangluba 'maida' packet nung

ayokba nungi saru shilem ajemja shilem 5 dang agitsü telemtetba agi. Ano menjang tajemba agi shilem 70 tashi aliba 'maida' taseptsü nung mesepi yokra GST saru magitsü aser packet nung yokra saru shilem 5 agitsü. GST Council-i GST Appellate Tribunal (GSTAT) Tir aser züngsemtem arrshi küm latetshio. GSTAT Tiriji arrshi küm 70 aser iba dang nungjagi tajemba asütsüla aser züngsemtemji arrshi küm 67 tashi dang asütsüla. Tamalen GSTST Tirji arrshi küm 67 tashi dang asütsü aser züngsemtemji arrshi küm 65 tashi dang asütsü lateta liasü.

PM Modi-i I-Day nü sangdongba onüktem asadang

New Delhi, October 07 (Agencies): Taküm Independence Day anogomong sentong nung Ato kilonser, Narendra Modi-i sangdongba kar agütsüba asadangtsü atema Honibarnü pai senden ka ayongzükba menogo. Red Fort nung Independence Day anogomong onük jembidang Modi-i sensakertem aser middle-class purtem ki asütsü atema sorkari sen aputsütsü sangdonga liasü; ajioda senden nung iba

sangdongba mapa kuma inyaksü atema terenemshiba jenjang asadang. Ato kilonserisa kibongtem nem solar power agütsütsü sangdonga liasü, yamaji iba scheme mapa kuma inyaksü atema terenemshiba jenjang asadang. August 15 nü Modi-i, sorkari scheme tasen ka tenzütsü, aser ibaji ajanga yimitem nung para kidang alirtem tajangzük angutsü, ta metetdakja liasü.

Red Fort nungi jembidang Modi-i, "Yimti nung alir sensakertemi timtem aika ajurur. Middle-class kibongtemi pei ki atema ki alitsü jangrar. Taruba küm ishika tsüngda onoki scheme tasen ka tenzütsü, aser ibaji ajanga yimti nung para kidang alir kibongtem tajangzük angutsü. Parnoki pei meyong ki sünüra onoki sen tetemlok magii yaritsü aser bank loan ajanga parnoki sen lakh aika kümzütsü," ta metetdakja liasü.

CWC senden nung caste census atema jembitsü

New Delhi, October 07 (Agencies): October 09 nü New Delhi nung ayongzükba Congress Working Committee (CWC) senden nung linük yimtenren tensa, Bihar nung caste survey ajanga bushitetba aser taruba Assembly elections atema o lemteptsü. Tawa Bihar nung Nitish Kumar-i aniba sorkari state nung caste survey agiba osang sangdongba sülen tang linük nung iba onük nung o toktepdar. Rahul Gandhi densema Congress bangdak lenirtemi

other backward classes (OBCs) indang census agitsüla, kechiyong kin ajak nütsüng sasep nung pei shilem atatsü temeden lir, ta akhanger. Taoba ita Parliament nung Women's Reservation Bill agizükba sülen tang mezüng CWC senden amentsü, anungji iba senden nung iba onük atema-a o lemteptsü akok. Parliament nung Congress-ia iba bill pusema liasü saka Scheduled Castes aser Tribes (SCs/STs) den OBC nungi tetsürtem atema temeja menden shiteta yutsütsüla, ta

Congress-i akhanger. CWC senden nungsa taküm November-December nung state pongu (Chhattisgarh, Rajasthan, Madhya Pradesh, Telangana aser Mizoram) nung Assembly elections agitsü aliba atema-a jembitsü aser asalentong yanglutsü. Tang Chhattisgarh aser Rajasthan na nung Congress sorkar lir, Madhya Pradesh nung BJP sorkar lir, Telangana nung Bharat Rashtra Samithi sorkar aser Mizoram nung Mizo National Front sorkar lir.




October 07, 2023 nü Patiala district nung Congress lenir, Navjot Singh Sidhu-i party lenir Sukhpal Singh Khaira, Nabha Jail nung ajuruba sülen osangbenertem den jembidang tangokba noksa nung angur.

India ya temaba linük asem rongnung adentsü: Dharmendra Pradhan

New Delhi, October 07 (Agencies): Honibarnü Union minister, Dharmendra Pradhan-i, India ya nükjidong tulu ayuba linük ka lir; taruba küm 25 tsüngda India ya alima nung temaba linük asem rongnung adentsü, ta ashi. Pune nung Symbiosis Ishanya Bhavan tasenba semzütkba sentong nung jembidang pai, "Taruba küm 25 tashi nung India ya alima tesendaktep tiyongtsü akümtsü. Alima nung tematiba linük asem rongnung asen linük adentsü. India ya nükjidong tulu ayuba

linük ka lir," ta ashi. Pune yimti dak sendakba nung pai, "Pune ya teshisadangba aser tasen apiteta inyakba yimti ka lir. Iba yimti putiotsü ya kanga takar aser shisaliok den tasen apiteta inyakba temaba yimti iba yimti ya lir. Iba yimti ya shisaliok tiyongtsü lir," ta ashi. "Sen kwi aazütsü mesüra kechi ajangzüktsü, ta masü saka shisaliok ajanga asen linük aser loktiliba kodaser tajangzük ngudaktsütsü, ta asenoki shisadangtsüla," ta pai ayongzük.



October 07, 2023 nü Srinagar nung Wildlife Week 2023 nungtem nung ayongzükba 'Walk for Wildlife' walkathon tetenzük sentong nung Jammu & Kashmir Lt. Governor, Manoj Sinha-i jembidang tangokba noksa nung angur.

India-i Israel nung aliba sensotem dang kümdangtsü metetdaksür

New Delhi, October 07 (Agencies): Tang Israel aser Gaza tsüngda raraba dak sendakba nung October 07 nü India-i Israel nung alir sensotem dang kanga kümdanga alitsü metetdaksüogo. Honibarnü Hamas-i Israel amak. Prangpong amertem arrtsü adena ait amakba den külemi Gaza Strip nungi rockets 5000 dak tema yoka Israel amak. Hamas-i ajungbena amakba mapang nung Israel nung 100 dak tema süogo, ta osang angazüker. Hamas-i amakba sülen Israel-i raraba tayimtsü amshia Gaza Strip nung Hamas amaktsü atema 'Operation Iron Swords' tenzütkogo.

/www.oref.org.il/en) repringang. Rongdak nungdak adokra +97235226748 ajanga onok den tongtepratepang m e s s i r a cons.l.telaviva@mea.gov.in ajanga osang metetdakjang. Nenok yaritsü atema Embassy ketdangsertem lir," ta metetdaksü. Honibarnep züngia Hamas-i amakba sülen Israel Ato kilonser, Benjamin Netanyahu-i, "Asenok tongbang nung lir," ta metetdaksüogo. Israel Minister of Defence, Yoav Gallant-i, "Tanep Hamas kiralongrartemi aibelen tuluka inyaka Israel anema rara ayongzükogo," ta metetdakja liasü.

Honibarnü Israel nung aliba Indain Embassy-i X ajanga, "Tang Israel tensa nung ajemdaker Israel nung aliba India nungertem dang kanga kümdanga mita alitsü mepishir aser ketdangsertemi tuyuba ama kümzüka alitsü tetuyuba ajak beshitsü mepishir. Yimlibilema kanga kümdanga liang, nungdak makaba nung tesenzü aser tejenokdak liang. Osang tejangja metetpelatsü atema yimlibilema Israeli Home Front Command website (https://

European Union Commission Tir, Ursula von der Leyen-ia Hamas-i Israel amakba aija, "Iba ya kiralongraba lir aser kanga aitsütsü tetemsü. Amakba anema nokdaksü Israel dak temeden lir," ta metetdaksü.

European Union Commission Tir, Ursula von der Leyen-ia Hamas-i Israel amakba aija, "Iba ya kiralongraba lir aser kanga aitsütsü tetemsü. Amakba anema nokdaksü Israel dak temeden lir," ta metetdaksü.



TIR YIMYIM YIMOBILEM (EDITORIAL)

DIMAPUR AMUNGNÜ, MONGPUTENI (OCTOBER) 08, 2023

Kü Teyari Kibuba nungi arur

Tanü Tir Yimyim küm 20 ajunger. Iba teyariji, Tenüngsang Ken 121 nung David chubai ashi ama, Kibuba shibai anüng aser alima yanglu, Pa nungi lir. Anungji, tamasa Pa nem tenüngsang agütsür aser Tir Yimyim azünger aser yaritepertem ajak dang kanga pelaba lemsateper. Alima nung tapu aika bilemyonga temang nung azü tera talila mesüra madoksa jaja nung mangmanga laoadoker aser masüyonga temang marakzüteti kecha inyak majung akümer. Aji oda, nisungi teti alitsü amai aika inyaksü aser bendentsü bilemyonga, ajungbena tango anenra, pa mesüra la temangji ajungli kuma aotsüba dang lir. Iba ama taküm ka ser nung taoba küm 20 tashi kenü danga methitemi anogo shia osangkaket adoka osangtsüsang aser tebilembatem lemsateptsüsa taküm aser mapang tajung moatsübaji koda taochi tulu ta süngmangseta bilemer. Atangji, anogo shia adokba osangkaketji Tir Yimyim dang masü, Tir Yimyim dang nungi tama aser tajungba adokba osangkaket aika lir, ajsüaka Tir Yimyim yabo balaka, kechiyong iba osangkaket yabo sen aser nebo peria akaba agi senotsü tsütsü tajangzük angutsü bilema tenzükba osangkaket ka masü. Ibaibo kecha maka ser nung asenok kanga nungdakba agi Tsüngremi ajungshia tenzükdaksüba mapa ka lir. Iba jagiang taoba küm 20 tsüngda timtem lendong kecha mataloki Kibuba tashi nung anir aruogo. Atangji, onok mapa asadangra, küm 20 tain memesük, ano Ao zülumena shitak mamshiteter aser orena junga matongtepteter. Aji oda, oren aika nung zünga aodang kitakkitaker Aori zülubo memesük anogo shia tapak kar nungbo zünya alitsü. Iba mekokmeinji onokia meteter saka nisunger yimya dak keta aliba ama peisasa pei mapa shitak kuma melenshitsübaji tasak, anungji ano aremzüka azüngtsüsa adoktsü. Ano, küm 20 ajungdang takok aika liaka, tesusatsüka tamakok kaji asenok osang kaket ya color nung madoktetba ya lir. Iba taginüba aser tejangraba ataloktsü asoshi onoki meranga inyaker aser Tsüngrem dang maneni sarasademer. Ajsüaka, ano külenbo temulung teraka süa bilembaji, osangkaket ajener adokba nung color madoktetaka, onoki Epaper-bo color nung agütsüteter. Ibaji tazünger aikati website nung aser Whatsapp amala nung zünga alitsü imlar. Atangji, tanü asungbo osang kaket alia azüngba dang nungi social media nung angati azünger teimba asütsü südi, iba jagi onoka pelaa bilemer, kechiyong osangkaket anibeleva adoka langa nisung aika nem züngdaksüner. Ajsüaka, ano takoksa kaji osangkaket ayokba nungi tajangzük tilaka anguba dak alaka whatsapp amala nung lemsatepa azüngba agibo osangkaket adoker masü saka mobile company purtemang ajangzüker. Itemji meteta tazüngertemi osang kaket alia, ibajiang kinunger aser kiyongertem den melentepa züngra, osangkaket adokertem asoshia tajangzük asütsü aser tazüngertema mobile nung tenüka meraksa aser sena mao ta jangra tatemala azüngtsü. Osangkaket adokba nung tajung kaji Olemsabang nung tezülur aikati onük balala nung peii bilemba aser ajangshiba indang lemsatepba ya asütsü. Itemji ajanga tazüngertem dang masü saka osangkaket adokertema shisatsü aser temetetba angur aser angazüker. Aji oda, osangkaket adokyonga tazüngertem rongnungi pei mulung lapoka pei bilemba aser metetba onüktem melemsatep asübo osangkaketji azüngazünger süla. Item ajakji bilema Olemsabang nung shilem agirtem dang kanga pelar. Atangji, joko tanü technology putu yimya agi osangkaket ajener prokshiba osang yabo kanga meilongi kümogo, anungji osangkaket adokdangbo osang ajak angashir atar. Ajsüaka, tatalokbatem tejangjaba nung azüngtsü aser nungdakbatembo rezünga ayutsü atemabo osangkaketbo osangkaketsa nungdaksü. Ibaji dang masü saka osangkaket nung tashitemetetertem balalai onük balala nung züluba ocettemji ajak asoshi tagitsü aser tajangzük aketba ocettem lir. Ano, asenok asoshibo ibai osangkaket dang masü saka asen tetsü oshi mesamai renlok daksütsü inyakba sentong ka lir. Iba tangatetba nung tazüngertemi kati ka ajangshitepa iba osangkaket ya azüngtsü aser ocet zülurtemia maneni zülutsü aser onokia ano tajungba aser tabensaba nung osangkaket adoktsü merangtepedi. Atangji, Kibubai asenok kanga yariogo.

OLEMSABANG

YISU OTSÜ: YISU ALIMAI ARUDIMA? HAU, SHITAK ARUTSÜ

~ T.N. JAMIR, Mokokchung

Okila: BC shi nungi AD 33 tashi nung Roman yimsüsüba mapang Palistan lima nung Yisu asoba aser asüba otsü ya kodang reprangdangdir tatalokbatemji kangasa nisungi rasa ashitsü makokba tesüngmangtsü ka lir. Yisu arutsüba ya küm aika lia ainkartemi shin; shitak aso, pei nüburi tepsettsü aser anogo asem nung shia arutsü, shitak shia arua kotaki atutsü aser tanaben arutsü ta shina lir. Item shinbatem atalokba amaji Pa arutsü ta shiba shitak arutsü. Ano Pa asodang tesüngmangtsü tatalokbatem aika lir, saka ka dang shidi. Mathi tapu anaji züngdangang; tashi temetetertemto kodang Yirusalemi aru, yangji alir ajak aoksatep ta zülua lir. Parnokji asen lima tilartem masü, alimai metetba VIP nisung ajaki tushia aliba nisungtem, ita peitnu takzür (Astrologer); parnokji alima linük (country) balala asem nungi arok ayongteper aru masü, memetetep sür Yirusalem nung dang ajurutep ta ashir. Asen Aor Laishir mongin, Doctorate nisung kati ashibaji, parnok rongnung kabo Bharatia lima nungi ta ashi, aser aji India lima (Bharat) nungi ta ashir. Paji süogo, nenok lanuri Google nung reprangdangang, angutsü akok. Tashi temetetertemji alima talang nungi ita anogo kwi jaja aru ashitsü makok. Ano alima talangi nungtogo nisung ka anogo painüji jaja arudangji nisungbaji dang masü, pa amenba kor den nisung ishikabosa apokatsü bener ano len-tom nung yipyonga arurji süki abenba Ut (Camel) kwi, aser par asem shia temeintertem ta asü dangji nisungtemji Yirusalem yimtiiji sünga nungzübaji ngua Yirusalem nung alirtemji aoksateper südi ta bilemer. Aji dang masü alima dangi Tsüngrem ka aruba agi ta bilemdi. Aji Yisu asodang atalokba otsü, ano Yisu asü dang atalokba-a tesüngmangtsü sayatenya (miracles) aika lir saka ka tang shidi. Yisu asüng südaktsütsü ta lia aonung nungi Farisi aser Saduki telok ana ya akhi mapangbo tzü o mi na amai meputep alibato iba Yisu anemabo zep ta longjemer Yirusalem yimti yimdong sünga tejak pazüker mit tulu adoka arüa nungzütep ta ashir. Aji shibai parnok dang kechi ashir na?. Tanünü Yisu metaba mapang nungji Yirusalem yimti ajunga kinük kisang ajak len tila-tulu, takar sensaker ajak tesüngmangtsüka jeptep ta ashir. Ano nikongdang kodang Arimathia nungba takarsangi Pilat dang Yisu mang meshi-i ao, Pilati kima (Verandah) nung nokdaka lia ngua pa aronga-aronga, arüa-arüa tashi agi ajep. Aji ngua Pilatjia kasa tashi agi ajep. Yamaji tenaprongji jebteper Pilati Yosef dangji ajemalua, tambo na kechi aginer ta süngdang. Idangji Yosefi asüktema jeba yimlibilema Yisu mangji kü nem kua ta meshir arem ta ashir.

Asen Aor Laishir mongisangi ashibaji Yihuda nung yimsü agi tebur atenshidak tetsür arutsü ozüng mali asünung Yisu tetsü nung oji nungi dang repranga anidak; tetezü kangki nung metar ajakji temang nung sü tila kata magii mangsa meta ta ashir. Asenoki noksa nung anguba yabo maksü asüba agi meyim oset ya sü tilla agi naipanger yangluba dang, asenoki Yisu film nung tetsür adoka anguba yabo senlu ayimertemi memetet sür adoktsürba ta ashir. Saka Maribo pei chir tepsetba ngua ajem melitet nung Tsüngrem ain ka dena tasü itshir tebur loktiji nungboka yir pei chir dakji koda meranglokteti kangki züng nungji azüiter azü jagi temang sünga jenpanger jeba lia, 'tetsür ne chir ajiang' ta ashibaji alima menen yong ni yamai mak asür ta tatishitsü sayur ta ashirba lir.

(Maneni asüng adok nung..)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Youth With A Mission (YWAM) tentetsang, Cunningham süogo



Loren Cunningham aser pa kinüngtsü, Darlene Joy Scratch-Cunningham na noksa nung angur.

October 07, 2023: Youth With A Mission (YWAM) tentetsang, Loren Cunningham October 6, 2023 nü alima nungi pilaogo; pa arrshi küm 88 liasü.

Pa Kona, Hawaii nung par kidang lia asü.

Taküm küm tetenzüklen Cunningham kinüngtsü, Darlene-i Facebook post ka ajanga la kinüngbu dak tepokpok cancer 'stage 4' putetogo, ta metetdakja liasü.

YWAM website ajanga, Cunningham arrshi küm 20 asüdang aser Bible college ka nung azüngdang pai alima tesem ajaklen Khrista osangtaung proktsü atema pa dak tejangraba tulu liasü, ta metetdaksü.

YWAM website ajanga ashiba agi, YWAM ya alima tesem ajaklen Yisu tenzüksü atema sobaliba balala aser zünga balala nungi bendanga agütsüba lanurtem indang Khristan movement ka lir.

Hokolbarnü YWAM-i sangdong ka ajanga, "Alima puti

otsü nung kin ajak semdangba mezüngbuba nisungji Loren lir. Khrista atema aser Khristai tenyaba wadang (Mark 16.15) atema pai territories aser asetkong 100 dak tema sema senziüogo," ta metetdaksü.

"Tangbo pa indang passport nung ano 'stamp' tasen ka: KODAK bendenlokogo," ta YWAM sangdong ajangasa metetdaksü.

Tesüiba küm aika tsüngda YWAM-i alima nung linük ajak ayimjemogo. YWAM nung toklang tenzükertem dang 'YWAMers' ta ajar.

Cunningham-i, Yisui Mark 16:15 nung ashiba o ajanga Tsüngremi pa den jemi aser pa arrshi küm 13 asüdangyongi Kibubai tenyaba wadang atema pa jateta liasü, ta ashi.

Küm ter sülen Bahamas nung kentenba 'tour' ka nung sarasadem dang pai mangdangji jangja liasü; pai mangdang nung alima 'map' agi lanurtem kümer continent ajak nung Yisu Khrista

osangtajung prokba angu.

Mangdang anguba sülen küm pezü lir 1960 küm Cunningham-i Youth With A Mission (YWAM) tenteta liasü. YWAM tentetba sülen küm 64 buba arudang iba organisation ya alima nung Khristan mission tulutiba rongnung ka kümogo.

2010 küm YWAM küm 50 ajungba mapang nung YWAM nung toklang volunteers 30,000 dak tema liasü. Item sentongtem nung nisung million 5 dak temai shilem agiogo.

Cunningham dang "Six Million Man" aja, kechiyong linük ajak semdangba mezüngbuba Khristan missionary ji pa liasü.

Loren Cunningham-i pa kinüngtsü, Darlene Joy Scratch-Cunningham den jala, Karen Joy Cunningham, jabaso, David Loren Cunningham (Judith Fitts-Cunningham) aser semchir asem- Madison Grace, Kenna Faith aser Liam Reed nungert toktsür pilaogo.

Uganda nung Khristan yimsü dangi meyiper apuani ana meindok



Sula Mugudi aser pa kinüngtsü, Aisha Mugudi na noksa nung angur.

October 07, 2023: Anüdoklen Uganda linük nung tambur ka aser pa kinüngtsü nati Khristan yimsü dangi meyipba sülen par kinünger Muslim nungertemi tena amokmerenba agi tena yimdak nungi jenogo.

Mayuge jila kübok Wakalende yimdak arrshi küm 70, Sula Mugudi aser pa kinüngtsü, Aisha Mugudi (62) nati September 16, 2023 nü Khrista agizüka liasü. Arogoi hopta piyong kiboksema jajaba

mapang nung tenati Khrista agizük.

Tena Khristan akümba sülen anogo asem lir tena aonung sarasadem sentong nung adentsü atema Tenla kidangi aoba. Tena kidangi shilangba mapang nung par kinüngertemi tejashi nung par ki raksatsür liasü.

Osangbener den jembidang Sula-i, "Küna kidanga meyipa aruba mapang nung ozü ki, azüki raksatsür liasü. Küna kidangi ayaketba mapang nung shidi ka nung, 'Tanü onoki nena ajurura ner ki raksatsütsü. Nenati yimsü tai ka shimba ajanga asen Muslim kinüngertem tenüng menüksüüogo', ta zülur liasü," ta metetdaksü.

Idangyongjisa tenati yim toktsür ajen.

Tena talidak maliba dang masü apen-süoshi aser chiyungtsü makai timtemba mapang nung pastor kati tena mejangjaba tesem ka nung jenokdaksüüogo.

ANOGO ABEN TSÜNGREM DEN

TANABEN MAONGKA

"nai ni meimer asü... Kü santem mesüang" Yohan 21:16

Temulung meyipba nisung shia-i anganüba o ka Yisui peter dang ashi... tanaben maongka. Peteri Yisu dang ni na metoktsütsü ta shiaka meimlaba mapang ka nung Yisu asemben menangzük. Yisui Peter dang Luk 22:32 nung ashi

Saka ne tamang tamakok mangutsü asoshi ni sarasademer, aser na kodang nai tanaben temulung meyipdir, ne adianutem nai tashi itdakjang"

Sayutsünger George Duncan-i ashi "arogo nisung agi mabensa liaka Peter tanaben anioka amshitsü aikati tarendaktsü" Saka Tsüngremi Pentecost anogo nung, Peter shimteta telok rongnung nokdaker jembidaktsü aser iba anogo nisung aika temulung meyip. Tatok ngua tanaben maongka anguba Peter Tsüngremi nisung aika temulung meyiptsü asoshi amshi.

Na Peter ama temulung meyipba taküm ka süra

Tsüngrem tanaben maongka agütsür. Nai-a alanga aliba adianu temulung meyipa dangi anir atua tanaben moangka agüjang.

SARASADEM:

Kibuba ni samar alidang nai ni bushiteta kü nem Ne chir akümtsü tanaben maongka agütsü nung pelar. Amen

Kohima Bible College küm 50 ajungba Jubilee Nov. 21 nungi amongtsü

Kohima, October 07 (TYO): Kohima Bible College (KBC) küm 50 ajungba Golden Jubilee mong taküm November 21 nungi November 26 tashi Rüzhükhrie GHSS Ground, Kohima nung amongtsü, ta KBC-i sangdong ka ajanga metetdaksü.

Tsüngremi küm 50 tashi len aniba atema tenüngsang agütsüba Jubilee mong nung adentsü atema Arogo ajak aser temeimertem ajak KBC-i jaoker, ta sangdong nung shia lir.

KBC-isa tamalen iba college nung azüngertem dang iba sentong nung adentsü atema registration agütsü asoshi + 9 1 9 4 0 2 0 0 7 1 1 2 , +919366221405, mesüra +919123534419 ajanga jelia tongtepratepang, ta metetdaksü.

Golden Jubilee atema October 26 nü High School Junction, Kohima nung 'Sales Day' ayongzüker, anungji ajak nem shilem agidaktsüner, ta KBC-i mepishia metetdaksü.

Ano külen KBC-i tamalen

azüngertem, temeimertem aser kaketshirtem dang Jubilee mong atema anogo asemnü lumiba sentong nung shilem agütsü ajungshi.

Iba dak sendakba nung KBC-i ajak dang alima nung mission, shi aser tanela naprongla nung taneptsü angütsü, nijatem aser asen lima atema sarasademtsü, tanelatem anir arutsü atema sarademtsü, Arogo tasen tentetba ministry nung inyaktsüpurtem atema sarasademtsü, Khrista nung telongjem atema sarasademtsü aser alima nung Kibuba yimli yangertsü atema sarasademtsü ayongzüker.

Iba dak alia Kohima Bible College maneni tejakleni aotsü, Tsüngremi nüngdakba ajak moatsütsü, Khrista nütüsung aika adoktsü aser tanela temeshi agi asüngba Tsüngrem tenzükertem aika adoktsü atema sarasademtsü ayongzüker.

Kohima Bible College (KBC) ya Northeast India nung mezüngbuba Charismatic Bible college lir.

AO OSHI ANGAZÜKDAK: TANÜ ANGAZÜKTSÜBA OJANG



Sangrasangji

(adj) mapa aser o purateta inyaktetba mesüra jembitetba (creativity)

* Tanü asüng lanurtemi sangrasangji mapa aika inyaka sayur.

Sangremer

(n) kinungtsü maliba tebur (widower)

* Sangremer kidang nisung kanga adenshir.

OLONG PAITEP # 6660

Grid for OLONG PAITEP # 6660 with numbers 1-16 in various cells.

TIPLIN

- 1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T ___ lu - (3)
10. Takdang temalen - (9)
11. Tesa ___ a - (3)
13. Ajungbena temulungjang tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

- 1. Reprangdaksü - (4)
2. ___ ur - (3)
4. Kiojen yangludak - (6)
6. ___ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemtdak - (6)
12. ___ adenshi - (4)
14. Tsünüsenbongtsü adokdak - (3)

OLONG PAITEP # 6659 TELANGZÜBA

TIPLIN :

- 1. Kasa, 6. Rangben, 7. Mait, 9. Poktet, 11. Ato, 13. Atasa, 16. Sük, 17. Rajang, 20. Lanu, 24. Nüngjem, 25. Süra.

LANGTSÜNGLEN :

- 1. Khu, 2. Süjak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Taju, 21. Ano, 22. Onü, 23. Pua.

NAI-A YA METETTER MA

Alima ajunga nung per aliba osang angashir, ajioda New Zealand linük nungbo per kata mali ta ashir.



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



Form with fields for 1. Tenüng, 2. Tasoba anogo, 3. Küm, 4. Class, 5. School, 6. Talidak, 7. Salem osang.

Sikkim nungi Meghalaya kaketshir 26 anir aruogo



Gangtok, October 7, 2023

(Agencies): Sikkim nung tzümetsüng lendong nungi Meghalaya nungi kaketshir 26 tashi October 7 nü anir aruogo.

Himalayan Pharmacy Institute aser Sikkim Manipal Institute of Technology nungi kaketshir 26 tashi tanü nikongdang 6:42 nung ISBT,

Shillong tonga anir aru.

Kaketshirtemi state sorkar dang parnok yariba atema pelaba metetdaksüogo.

Külen Meghalaya sorkari parnok college campus nungi Siliguri tashi gari ka aser ano Siliguri nungi Shillong tashi bus ka anepalua anir aru. Sikkim sorkar

ketdangsürtemi Majitar, Sikkim nung anendaka aliba Meghalaya nungi kaketshir 26 anientsü atema gari pungu anepalua liasü.

Sikkim Chief Minister Prem Singh Tamang-i district administration dang pei talidak toktsür aoertem yaritsü atema tetuyuba agütsüogo.

SI Junmoni Rabha asüba atema CBI-i SP Leena Doley dang asüngdangya

Guwahati, October 7, 2023

(Agencies): Assam police sub-inspector (SI) Junmoni Rabha asüba dak sendakba ken o nung CBI ketdangsürtemi taoba Nagaon SP Leena Doley dang asüngdangya süogo.

Honibarnü Nagaon circuit house nung CBI ketdangsürtemi Leena Doley dang ghonda aika asüngdangya asü.

Arishi küm 30 tain SI Junmoni Rabha ya Nagaon district kübok Morikolong police outpost nung in-charge liasü. May 16 nü la Sarubhugia

yimtsüng nung gari lendong ka nung asü.

Iba lendong atalokba sülen Rabha'er kinunger aser medemertemi la asüba nung taitsü keta lir aser iba atema bushisüngdang asütsü takhangba agütsü.

State sorkari agütsüba sülen CBI-i June 24 nü iba ken o bushisüngdang tenzük.

October 4 nü SI Junmoni Rabha indang gari nungi mobile phones anguba ajanga bushisüngdangba maparen melenshia liasü. Rabha indang mobile

phone anguba sülen Leena Doley dang asüngdangyatsü jaok. Tanü la dang ghonda pungu tashi CBI-i asüngdangya asü.

CBI-isa taoba Lakhimpur district SP Bedanta Madhav aser additional SP Runa Neog na dang asüngdangya süogo.

SI Junmoni Rabha tetsü Sumitra Rabha-i Jakhlabandha police station nung FIR ka benoka liasü.

Sumitra-i FIR nung Leena Doley den Nagaon nung police ketdangsür kar tenüng tetshia liasü.

Manipur nung October 11 tashi mobile internet noktangtsü

Imphal, October 7, 2023

(Agencies): Manipur sorkari October 11 tashi mobile internet services noktangba atsülangogo.

Lanur ana tepsetba anema kaketshirtemi lungkak aitba sülen September 26, 2023 nü state sorkari internet noktang.

Kaketshirtemi lungkak aitba mapang parnok 100 shi security forces den raratepdang yiru.

Manipur sorkari October 6 nü ano anogo pungu atema

internet noktangba atsülanga liasü. Social media nung osang tai prokshiba azüoktsü atema state sorkari iba telemtet agi.

“Ozüng alema inyakertemi social media tim mesüi amshitsü akok ta bilemer. Parnoki noksa, tesempatep adokba osang aser video prokshitsü akok aser iba ajanga Manipur nung law & order tensa tamajungba akümtsü” ta Commissioner (Home) T. Ranjit Singh-i

sangdong ka nung ashi.

Ajisiaka, kaketshir teloktem aser civil society groups dena nisung aikati internet noktangba magizüiker.

Senapati district nunga kaketshir telok kati mobile internet services noktangba anema rongsenketzung tenokdangba agütsüogo. Iba ajanga Manipur-Nagaland arrtsülen khu abenba gari aika anendaka lir.



Shisaliok reju nung kaket shisatsü angazükba den külemi alima tesem balala rajema lidaktsütsü nukjidong nung, Hokolbar anogo (06.10.23) J.N. Aier Residential School, Yajang 'C' Mokokchung ajanga 'Educational Tour' ka ayongzük. Iba tour shilem ama tesayur akhüm nung class 2 nungi 6 nung azünger kaketshirtemi Dibrugarh, Assam semdanga liasü. Iba anogo tesayur aser kaketshir temi Bogibeel Bridge, Kanchanjangha Resort, Mahatma Gandhi Udyaan (Khanikar Park) aser shishilembaba tesemtem sema senzüogo. Bogibeel Bridge sema senzür sülen kaketshir aser tesayur tem külemi Kanchanjangha Floating Restaurant anasa tangokba noksa yangi angur.

Hamas-i Israel amak; nisung 198 süogo



Honibarnü southern Israel kübok Ashkelon yimti nung kima anena aliba gari ka Gaza Strip-ikhaketa yokba rocket agi kongshir mi adokba noksa nung angur.

Jerusalem, Mongputeeni/ October 7 (Agencies): Palestine nung Hamas teloki Honibarnü Israel anüoletip maka nisung 198 tepset aser nisung noklang aika yiruogo, ta local media sangdong balala ajanga metetdaksü. Gaza Strip nungi rocket 2000 dak tema khaketa yokba sülen parnok Israel litsü ia maka liasü.

Israel indang Defence Minister Yoav Gallant-i, Hamas puri aibelen tulu ka menaogo ta ashi. Honibarnü 06:30 ako shi nung Hamas puri Israel amak tenzüik, kong Gaza kübok tesem balala nungi rocket khaketa yokba aser sepaitem, ali, tzüyim aser anüing ajanga Israel telungi ia amakba densema lir.

"Israel nung lisopurtem asenok rara nung lir," ta Israel Ato Kilonser Benjamin Netanyahu-i, Tel Aviv nung military headquarters nungi video osang ka ajanga ashi.

Hamas military commander, Mohammed Deif-i ashiba agi, rocket khaketa yokba ya "Operation Al-Aqsa Flood" tenzüikba temaitsü liasü. Paisa, Palestine nungertem dang parnok kolen lider liaka Israel den raratsü ayongzüka liasü.

"Joko ojang ta asütsü ta onoki telemtetba agiogo," ta Deif-i ashiba den palestine nungertem dang Israel den raratsü asoshi ayongzüka liasü.

Israel military-i Gaza Strip temeket nung aliba Israel nungertem dang pei ki toktsür maotsü metetdaksüba den

Hamas puri parnok inyakyim atema taa agütsütsü ta ashi.

Israel media sangdong balala ajanga ashiba agi, Palestine nung sepaitemi Sderot jila nung senzüsenpongtem dak injang khalokja liasü aser social media nung parnokshiba video balala nung Palestine nungertem uniform semer arrtsü nung raratepba sayuogo.

Tanga video ka nung Israel indang tank ka rongga aliba meketa Palestine nung raratepba nguogo.

Honibarnü anepdang nungi Israel nung tayimtsü temi Gaza kübok tesem balala amak tenzüikogo, koba military-i "Operation Iron Swords" ta ajar aser iba den Israel nung sepaitemi tesem balala nung Palestine nungertem den raratepdar.

"Onok dang raratepba mapang lir. Onok Gaza Strip temeket nung tesem balala nung raratepdar.. Onok sepaitem ali nung raradar," ta Israel army otongdar Richard Hecht-i osangbenertem dang ashi.

Gaza nung tenük kuli agütsürtemi ashiba agi, parnok bomb apokba ola tulu angashi aser Israel-i tayimtsü amshia mezüingbuba amakba mapang nisung ka tepseta liasü, ta media sangdong balala ajanga metetdaksü.

Israel aser Gaza na arrtsü nung aser Israeli atsünger aliba West Bank nung hopta aika tensa mejungi arur Israel sepai

aser Palestine nung sepaitem tsüingda rara tenzüikogo.

Taküm Israel nung sepaitemi Palestine nung 247 bo tepsetogo aser Israel nung 32 aser bendanger ana ta Palestine nungeri tesem balala amakba mapang tepsetogo.

Middle East Peace Process atema United Nations special coordinator Wennesland-i, Gaza anasa Israel nung jila aser yimtitem tesem balala nung amakba aitsüogo, koba pai ashiba agi, nüburtem dak rangloker amakba lir aser aitsütsü langa lir.

Kasa mapang nung Honibarnü Telegram messaging app nung post ka ajanga Hamas puri, West Bank nung resistance fighter tem aser Arab aser Islamic linüktem parnok den longjemer raratsü atema ayongzüikogo.

Mintoker aliba Hamas nung lenir Saleh al-Arouri-i, "Operation Al-Aqsa Flood" ya par litsü atsüingba atema telangzüba agütsüba ka lir aser Palestine nung raratem East Jerusalem nung Israel-i atsünger aliba tesem kümzüka ayutsü raraba lir.

Lebanon nung Hezbollah movement, koba 1982 küm Israel-i southern Lebanon atsüingba atema raratsü asoshi tenteta liasü parnok ashiba agi, Gaza nung tatalokbatem parnok kanga junga asadanga atadar aser Palestine nung resistance lenirtem den indang indanga sendaktepdar.

MOLUNGNEN O



Late Wabong : Tzutinokdang
28-07-1985 : 14-09-2023

Ammang milen asepa ama ajungben ozü kibong nung asüku tulu ajurudang imtiyimsanger tulu tila, kishikinar, anükapang ajaki taküm rongsen nübu jenti tenla agüja yariba ajak dang pelaba sangdonger. Nenok temeim mapa Tsüngremi shia moajang ta ozü tamang sarasadem .

Ajak dang jungnüsang temeim Oba, Na malibo imtiyimtong azünga kümogoni.

Myanmar: SC-i Suu Kyi-i mepeshiba magizük

Bangkok, Mongputeni/ October 7 (Agencies): Military-i atsüngtoker aliba Myanmar nung lenir Aung San Suu Kyi-i la anema benoka aliba ken o trok dak sendakba nung temepeshiba agütsüba Myanmar Supreme Court-i Hokolbarnü magizüki liasü, ta legal ketdangsür kati ashi.

Arishi küm 78 tain Suu Kyi, shiba 2021 küm February ita army-i civilian sorkar atsüngokba mapang pua liasü la tepuokdak küm 27 ayutsü atema obendang agütsür lir. Ken o balala nung la aija tang tepuokdak yua lir.

La pusemertem aser independent analyst temi ashiba agi, la aitsüba ken o koba Suu Kyi aser la okatsüri toktepdangogo, item ya shidak masü aser ken o tem ya la jenjang makai kümdaktsütsü aser military-i sorkar atsüngba ya kuli shitadak dak ajemdaker inyak ta kümdaktsütsü merangba ka lir.

La mezüingbuba küm 33 tepuokdak ayutsü obendang agütsü ajisüaka Senior Gen. Min Aung Hlaing-i ken o pongu nung la nem taitok agütsü aser la tepuokdak ayutsüba küm trok agi ajemja liasü.

Legal ketdangsür, shibai Suu Kyi indang ken o jangja lir, pai

ashiba agi linük yimtiba Naypyitaw nung court-i, Naypyitaw aser Yangon yimti nung la tashi amshia ali aser kiojen amshitsü temelaba agütsüba ken o pezü densema tanga ken o angadangtsü memulungi liasü.

Lai shishilembadak jenjang dang nungi tajemba agi charitable foundation ka atema ali alizükba aser foundation-i tenla agütsüba sen agi ali ka nung ki ka yangluba atema la aitsür lir. Suu Kyi okatsür, shibai okadak ken o benoka asadanga indang osang agüja liasü pa nema 2021 küm osang kecha melemsateptsü asoshi tetuyuba agütsüogo.

Ketdangsür yagisa, 2018 aser 2020 tsüingda Maung Weik ket nungi USD 550,000 agizükba atema Suu Kyi aitsüogo, ta ashi.

Myanmar nung special appeal tem ya judicial inyakyim nung tatembangbuba jenjang lir. Ajisüaka ken o ya chief justice-i nüburtem tejangraba dak sendaka lir ta blemra Special Appeals Tribunal mesüra Plenary Tribunal-i tanaben asadangshitsü.

Suu Kyi ya election nung ochi mashi inyakyim, official secrets acts nung aibelenba aser tanga ochi mashi ken o trok nung aija lir.

Afghanistan nung menoknok anak; nisung 14 asü, 78 yiru

Kabul, Mongputeni/ October 7 (Agencies): 6.3 magnitude tesashi menoknok kati Afghanistan anüolen kongshiba sülen nisung 14 süogo aser nisung 78 yiru lir, ta ketdangsürtemi metetdaksü.

Menoknok anakba sülen anentsü aluba aser kitem chirepba osang aika adokdar anungi asürtem ya timba akümtsü imlar, ta parnokisa shisem.

United States Geological Survey-i ashiba agi, epicentre ya iba tesem nung yimti tulutiba Heart nungi km 40 pilar liasü. Menoknok anakba sülen ano 5.5, 4.7, 6.3, 5.9 aser 4.6



Afghanistan menoknok ajanga ki raksaba noksa angur.

ta aftershock pongu ajangshia liasü.

Social media nung lemsatepba video tem ajanga yimti nung alirtem aser dokan

kiburtem kitem nungi jenshiba nguogo.

"Onok office nung liasü aser ajungbena ki arakzü tenzüik," ta Herat nung alir arishi küm 45

tain Bashir Ahmad-i AFP dang ashiba den jara nungi plaster tem alu tenzüik aser jara nung tapok adok tenzüikba den ki shilem karbo chirepa liasü.

"Ni ozü kinungertem den tongtepratep mesüteter, kechiyong network connections disconnect süogo. Ni kanga shisabulur aser tetsüba tsübur," ta pai ashi.

National disaster management authority otongdar-i AFP dang ashiba agi, asürtem sangdongba ya mezüingbuba shilem dang lir aser ano aika sür alitsü imlar, kechiyong yimdak yimtsüing aser tenem nung aliba tesemtem nung anentsüh dena aluogo.

"Tang onok ket nung osang tejangja mali," ta pai ashi.

USGS preliminary report ajanga, nisung noklang aika sür alitsü akok ta shiogo.

Heart yimti ya Afghanistan indang cultural capital ama züingshir aser iba yimti nung nütsüing yongsük million 1.9 lir. Taoba küm June ita 5.9-magnitude menoknok kati Afghanistan kongshiba sülen nisung 1000 dak tema asü aser nisung meyirejang aika talidak makai aküm.

Taküm küma March ita northeastern Afghanistan nung Jurm anasa menoknok ka anakba sülen nisung 13 tashi süa liasü.

Asian Games: India nunger asayartemi gold medal 3 angu



Mongputeni/October 7, 2023 (Agencies): Tang asaya aliba Asian Games nung Honibarnü India nunger badminton tebur tarep asayar Satwiksairaj Rankireddy aser Chirag Shetty nati South Korea nunger tarep Choi Solgyu aser Kim Wonho na 21-18 21-16 agi koka otsüsütsüsa gold medal ka nguogo.

Taküm March ita world number 3 Satwik aser Chirag nati küm 58 nung India nunger rongnungi mezüngbuba Asian championships akokba sülen tang Asian Games nunga takok tajung ngutetogo.

Küm 41 tejakdang Leroy D'sa aser Pradeep Gandhe nati 1982 küm bronze medal ka anguba sülen tarep asaya nung tenati tang mezüngbuba medal ka nguogo.

Satwik aser Chirag nati 2022 Commonwealth Games gold, 2022 Thomas Cup title aser 2022 World Championships bronze ngur aliba den bendenloksema tang Asian Games nunga gold medal nguogo.

Tenatisa taküm Asia Championships nung gold anguba den Indonesia Super 1000, Korea Super 500 aser

Swiss Open Super 300 kokogo. Honibarnüsa India nunger archer Ojas Deotale aser Jyothi Surekha Vennam nati gold angu aser Aditi Swami-i bronze aser Abhishek Verma-i silver ngua liasü.

World champion Aditi-i bronze atema asayaba mapang Indonesia tsür Ratih Zilizati Fadhly 146-140 agi koka bronze medal ngua liasü.

Iba sülen Jyothi, shibai tarep temeyoktep asaya aser tetsür team asaya nung gold ngur liasü lai South Korea tsür So Chaewon 149-145 agi koka gold medal ngua liasü.

Ano tebur kija asaya nung Deotale-i 149-147 agi asaya koka gold medal ka ngua liasü.

Maneni tebur Kabaddi asaya final nung India team-i 33-29 agi Iran madak takok ngua gold medal nguogo.

Asaya mezüngbuba shilem nung team anaprongla kanga toktepa asaya aser point 17-13 agi dang India tejakdang liasü. Ajisüaka asaya tanabuba shilem nung India team-ia kanga junga asaya asaya atemtsü minute 10 dang anunga lia point 25-25 ta kasasa aküm

Asaya atemtsü minute 2 dang anunga lir poinr 28-28 liasü saka tatemi India team-i tajungba asayateta asaya 33-29 agi koka liasü.

Simone Biles-i otsü tasen ka yangluogo

Mongputeni/October 7, 2023 (Agencies): Nüngtugu US tsür Simone Biles-i maneni kanga junga asaya Hokolbarnü World Gymnastics Championships nung world title 21buba benogo. La küm ana tashi masayai aliba meyipa arur maneni takok tajung angutetogo.

Bodhbarnü team asaya nung gold medal anguba sülen

America tsür la yagi kija asaya nung point 58.399 ngua la Brazil tsür defending champion Rebeca Andrade (56.766), aser külem American teammate Shilese Jones (56.332) na jakdang tembanga liasü.

Arishi küm 26 tain asayar yagi tang agi World Championship nung medal 27buba nguogo.

Asayamung nung ano la

apparatus finals pezü nung asayatsü lir anungji medal talila angutsü akok.

Tokyo Olympics nung mepetmesü adoba sülen Biles küm ana tashi masayai liasü, ajisüaka tang meyipa arura takok angu tenzükogo.

La takok tajung angutsü imla Japan-i ao ajisüaka final asaya pongu nungi pezü nung masayatsü asoshi teelemtetba agia liasü.

Women's U19 ODI asayamung atema Nagaland team sangdongogo



NAGALAND WOMENS U19 TEAM

Dimapur, Mongputeni/October 7 (TYO): Indore, Madhya Pradesh nung asayatsü aliba Women's U19 One Day Trophy 2023-24 atema Nagaland Cricket Association-i, Nagaland U-19 tetsür team sangdongogo.

Team nung asayartem : 1. Bipila (C), 2. Idaubeule, 3. Imsusenla, 4. Kajenkala, 5. Kevisienuo, 6. Kehungzeule, 7. Vipeni, 8. Najmeen Khatun,

9. Meriyani Kikon, 10. Radhika Mondal, 11. Rongsenmenla, 12. Sungjemenla Pongen, 13. Roma Subha, 14. Sangtinario, 15. Magdalin Dorje.

Support staff : 1. Talikaba-Team manager/Asst coach EAM MANAGER/ASST. COACH, 2. Deepali C Patkar- Head coach, 3. S&C Coach- Lanumingla Jamir, 4. Kiboli Yeptho- Physio.

Fixture:

8th Oct. 2023: Nagaland vs Chhattisgarh
10th Oct. 2023: Nagaland vs Tripura
12th Oct. 2023: Nagaland vs Haryana
14th Oct. 2023: Nagaland vs Bengal
16th Oct. 2023: Nagaland vs Uttarakhand
Asayatem ajak Indore, Madhya Pradesh nung dang asayatsü. Asayatem Live score update @bcci.tv nung angutsü.

Aiden Markram-i World Cup nung takaratiba century yanglu

New Delhi, Mongputni/October 7 (Agencies): Honibarnü Sri Lanka den asaya nung South Africa nunger asayar Aiden Markram-i kanga junga asaya ball 49 nung century ka yangluogo, koba 50-overs World Cup cricket nung century takaratiba yangluba lir.

Iba asaya nung South Africa nunger batter temi kanga junga asaya parnoki asayar 5 out ser run 428 yanglua liasü.

2011 World Cup nung England den asayaba mapang Ireland nunger asayar Kevin O'Brien-i ball 50 nung century yanglur liasü saka tang Markram-i ajatetogo.


Honibarnü South Africa nunger top-order batter temi kanga junga asaya-a, Quinton

de Kock aser Rassie van der Dussen nati century kaka yanglu aser iba ajanga team-i run aika yangluba nung teyari agüja liasü. De Kock-i run 100 aser van der Dussen-i run 108 yanglua tena senteper run 204 yanglu.

De Kock aser van der Dussen na out asüba sülena Markram-i Sri Lanka nunger bowler tem nem timtem agüja liasü. Asaya nung pai four 14 aser six asem züka liasü.

Honibarnü ya South Africa team atema otsüsütsüsa ka liasü, kechiyong World Cup puti otsü nung tang mezüngbuba team kati innings ka nung cenrutu asem yangluogo aser iba ajanga batting nung South Africa tashi sayur.

China Open: Iga Swiatek Final-i iogo



Mongputeni/October 7, 2023 (Agencies): Honibarnü Beijing nung China Open semifinal nung Coco Gauff madak takok anguba sülen Iga Swiatek tetsür kija asaya final-i iogo.

Gauff ya asaya 17 tashi khen danga tamakok mongui asaya aliba tang tamakok nguogo.

Swiatek-i, US Open champion ya 6-2, 6-3 agi kokogo aser la Deobarnü Elena Rybakina mesüra Liudmila Samsonova den final asayatsü.

Poland tsür la yagi mezüngbuba set tetenzük nungi maongka tajung agiteta asaya aser Gauff nem kecha maongka magütsü liasü, shibai asaya nung aibelen aika mena.

Mezüngbuba set nung Swiatek-i mapang mintok aser Gauff indang serve ana tashi break süa asaya ayong ayonga koka liasü.

Tanabuba set nunga Grand Slam pezü tashi koker alila yagi mezüngbuba game indang serve break asü aser iba sülen Gauff tapu nung timtem aliba ajanga temang anepalua liasü.

Iba sülen Swiatek-i maneni kanga junga asaya aser arishi küm 19 tain Gauff-i net nung ball ka zükloktsüba sülen asaya koka liasü.

August ita Montreal nung Jessica Pegula makokba sülenbo Gauff asaya ka nung danga tamakok mongui asaya arur tang tamakok nguogo.

Beijing-i Covid-19 dak sendakba nung tenokdangba tesashi agütsür aliba ajanga masayai arur 2019 küm sülen taküm mezüngbuba China Open ayongzüka sayadar.

Teburtem asaya Bodhbarnü tembangogo aser final asaya nung Italy nunger asayar Jannik Sinner-i world number 3 asayar Daniil Medvedev koka liasü.

BILEMDANGANG

"Ochi asoshibo masetshi-i nokdakang."